

四庫全書

集部

欽定四庫全書

集部

午溪集卷六至十

詳校官編修臣翟槐

中書臣劉源溥覆勘

覆校官中書臣方大川

分校官中書臣牛稔文

謄錄監生臣蔣瀚

欽定四庫全書

午溪集卷六

七言律詩

石門紀遊

元 陳鎰 撰

山藏仙窟好溪湄滿徑秋雲冷濕衣萬古石門青不合
半天瀑布雪長飛猿攀松子巖前落鶴趁琴童洞口歸
謝李何年留傑句至今山水有清暉

紫虛觀

紫虛宮近少微垣俯瞰粼粼碧一川
劫火不燒鍾呂像
古碑尚記李唐年
龍飛劍影來深洞
鳳戴簫聲下九天
千載葛洪丹井在
神光猶自發靈泉

觀遺兵火鍾呂二像如故

江心寺

四顧瀰漫雪浪翻
巍巍臺殿壓雲根
天連塔影浮江浦
風送鐘聲落海門
老衲倚闌延月色
潛蛟蟠穴候潮痕
古今登覽無窮思
雲氣蒼蒼島樹昏

甘露寺廢址

金碧樓臺安在哉
空留鐵塔鎮崔嵬
慈雲散盡無甘露
烈火燒殘有劫灰
巨鑊欹斜堆敗葉
斷碑零落付蒼苔
老僧飛錫知何處
落日長江潮自回

遊蒼山道院

松桂蒼蒼匝道邊
林光搖蕩拂晴川
桃花流水人間世
石室丹霞洞府天
一榻清風生竹潤
半簷疎雨入茶烟
詩人往往餘吟咏
閒別蒼苔看石鐫

次韻月明德經歷游茅山

三峯翠色倚高冥萬壑松聲撼百靈
列宿拱垣低月殿彩雲扶輦近芝亭
紫壇露冷晨幢濕金闕風微午篆馨
遙想羣仙飛珮處碧霞縹緲玉瓏玲

又次韻宿元符宮

天風送客到茅山山疊千重路百盤
松下石碑留玉篆竹邊藥竈養金丹
聲沈萬籟乾坤靜氣肅九霄風露寒
乞取鼎餘換凡骨好隨僊侶躡飛鸞

丹陽早發

浮生擾擾幾時休，又向長河理去舟。
雁帶吳雲鄉信遠，蛩鳴楚月客心愁。
依依老柳風烟晚，獵獵黃蘆水國秋。
借問今宵何處宿，遙山青外是瓜洲。

遊西峯寺

山繞招提面面青，黃金臺殿敞春晴。
樹分兩徑參差起，水積方池澹沲清。
並命鳥飛爭供食，長生魚出聽鐘聲。
湛然亭上凭闌久，閑看溪雲傍塔生。

三岩

塵土寰中有底忙
禪扉咫尺自清涼
雲深古洞苔生井
露冷疎林月滿廊
紫玉敲開金色相
水晶簷動白毫光
憑誰捲取天潢雪
好把楊枝灑下方

次韻鄧知州會秦郵乾明寺二首

特向詩禪覓一叅
秦郵寺裏聽雄談
政成洛北官方滿
家近淮南路熟諳
春日竹窓多雅趣
暮年蔗境有餘甘
超然跳出塵籠外
風月招邀興倍堪

解組歸來隱樂郊
手開藥圃旋除茅
巢雲野鶴新添子
亞水苔梅曲引梢
翰苑曾傳坡老句
禪門今結遁公交
日來清思知何在
茶臼時時隔竹敲

再次韻呈天岸長老

妙法無邊竟莫參
洗心只欲聽清談
空門枯淡師能守
行路艱難我慣諳
芸几半窻烟穗碧
茶甌一掬井花甘
淵明他日重來此
蓮社投盟諒自堪

瀟灑禪房近碧郊
短牆重疊蓋黃茅
光翻池上千桃樹

秀入階前萬柳梢水滿草生魚意樂風微日暖鳥聲交
更無餘事跣趺外從遣碁聲畫屢敲

三用韻呈天石長老

不二門中試往叅了無文字况言談安心有法何從覓
應事隨機已熟諳午榻偶聽風竹響春厨時薦野蔬甘
勞生自愧多煩惱寧止嵇康七不堪

路入琅山十里郊曾聞卓錫蓋新茅靈巖中堅擎天石
祇樹東回偃月梢欲比淵明來入社也應支遁肯聯交

他時襖被來尋約長聽鐘聲夜半敲

旅懷

滿樓風露薄幽襟素練縈窓月影臨市散燈收人語靜
夢回酒醒夜寒深淮山殘雪三年客枯嶺飛雲萬里心
珍重綠猗亭上竹平安長遣寄清吟

次韻答友人

青雲萬里豁雄襟淮海東邊得共臨吳楚地分平野濶
金焦山湧大江深秋風楊柳離亭恨夜月梅花故國心

試上層樓一悵望手絃綠綺和高吟

贈李晉卿葬師歸龍泉

瀟瀟霜霰點行裝驢瘦童寒路更長十載江湖雙白鬢
半生山水一青囊摩挲古劍心猶壯邂逅清尊興自狂
歲晚不堪成話別石橋流水野梅香

春日次韻羅善先照磨二首

客裏光陰一瞬過壯年心事易蹉跎人生用舍同芻狗
世態炎涼似脚婆綠靄釀春歸楚樹玉塵吹雨漲淮波

相逢此地重攜手無奈千絲柳色多

綠陰亭館曉光新久客秦淮兩度春
霏屑雄談頻落塵
軋霄老句更驚人游山未可閑
安石畊谷寧容老子真
斛水蛟龍能變化春雷一鼓到天津

再次韻答王子愚

草木城深一雨過流年如此惜蹉跎
雲間后土來天女
風外清淮舞浪婆旅邸晝銷茶煮雪
歌樓春透酒生波
憑高目斷江南路無限遠山歸興多

簷影參差樹色新
曉鶯啼破畫橋春
柳分稚綠初明眼
花釀濃香欲醉人
白日遊絲吟趣遠
閒雲流水道情真
管絃不入騷人耳
緩策尋芳傍野津

和程渠翁見惠詩韻

郊峯深處客忘還
硯石從容意自閒
乘興無舟來劍曲
懷人有夢到松間
謀生每愧兔三窟
學道長憐豹一斑
若問日來新況味
飯牛聊復卧南山

次韻陳和仲

江湖十載感流萍一日居山夢始清
林下散樗難大用道旁苦李得全生
拂苔蒼石和雲坐種秫平疇帶月耕
慚愧故人疎濶甚南箕北斗信虛名

挽西巖崇上人

絕俗離群付陸沈屋雲分住古岷陰
案頭經卷香猶在窓下蒲團塵欲侵
翠擁山屏餘色相清涵海滴印禪心
客來何處尋行跡黃葉漫山秋露深

寺中有屏山
軒海滴泉

次韻客中送友人歸栢蒼二首

落花飛絮滿江城薄靄遙遮遠色明別酒亂澆胸壘塊
狂詩儘放筆縱橫石橋立馬日還暮野岸移舟潮已生
自覺老懷偏作惡客中送客倍關情

東風吹雨似輕塵握手河梁未忍分芳草綠波無限思
落花啼鵲不多春離尊今夕燕城月去棹明朝瓜浦雲
寄語故山猿鶴道秋來我亦整歸輪

次韻枯梅

苔封蘚蝕百年身雪虐霜饕數點春留得此花叅太極

看來生意是深仁羅浮仙子冰魂返飯顆詩人瘦態真
不許世間兒女比臨風孤艷絕芳塵

次韻植竹

森森蒼玉謝斤鋤幽翫惟便山澤癯曉潤烟光連別墅
夜涼月色滿前湖解苞便有風霜節寫影真成水墨圖
對此翛然忘俗慮一杯拾葉煮雲腴

和周濟翁寫別韻

西風兩鬢已蒼然萬事無心只任天細飲黃花新酒味

長吟綠竹舊詩篇登高未落龍山帽盡興先回剡曲船
後夜定知窻外月照人涼冷不成眠

次韻村景

芋葉瓜藤綠滿田數家烟火接平原溪分秋水繞孤嶼
山障夕陽明半村訪鶴客來松下徑掃花童立竹邊門
居安便是神仙境何必桃源避世喧

八月十四夜宿松溪山莊次韻

湖海經年滯客程相逢一嘯叙前盟路經山雨青泥滑

風捲溪雲白月明幸有芳尊酬此夕惜無佳句續高情
酒醒不惜匆匆別共聽鐘聲出曉城

和劉益洲訓導見惠詩韻

五年奔走客中忙想詩筒翰墨香老我日添頭髮白
故園秋負菊花黃勞生自笑烏三繞養拙還同龜六藏
何日相過溪竹外款陪尊酒到斜陽

哭外舅此山先生

才名奕奕冠當今投老林泉樂意深太華黃河曾識面

玉堂金馬有知心壽杯未及希年賀詩卷空添近日吟
慨想音容尚如此西風吹淚滿衣襟

旅懷

久客江城事事慳一尊聊爾破愁端吳雲無雁傳鄉信
楚水有魚供旅殮燕子乍來風力軟桃花欲動雨聲乾
今朝偶為尋芳出試看春衫尚覺寒

乙酉二月十六日偕楊貫道謁張貞居外史留

宿南山登善庵明旦以詩奉別

礪阿不到一年餘此日重來訪隱居銀燭照花明綠酒
石函封蘚貯丹書雨添瀑水春池滿雲起山窓曉室虛
自愧匆匆迴俗駕不堪松下別霞裾

陪黃晉卿提舉楊震卿山長宴張貞居外史竹軒

仙家風景少人知亭館春明宴客遲黃甔登盤脂似蠟
白魚落刀鱠如絲天香冉冉花雙品日色暉暉竹數枝
始信蓬萊在塵世門前車馬自紛馳

坐上有牡丹
二朵故云

送張仲舉應奉回京師宴韓提舉宅

主人開酌宴華堂異果珍羞次第嘗
燕客題詩鄉思遠
吳姬勸酒曲聲長
風吹楊柳依依綠
雨過荼蘼細細香
此會殷勤還繼燭
莫教今夕斷離腸

題陳思復喜白髮詩卷

高人大隱養修齡
喜見年來白髮生
種種儘從頭上滿
星星漸向鏡中明
不緣憂事添千丈
只為看詩益幾莖
一任鬢髻颯垂領
居閑幸免著塵纓

次韻白蓮

素質天然不假妝盈盈步入水雲鄉前身曾結遠公社
古製猶存屈子裳月佩有聲沈水玉冰肌無汗愜龍堂
夜深偏稱清閑客來共西池一味涼

次韻高則誠參軍題少微山巨樟

老氣長身倚斷崖蒼皮鉄甲漬深苔幾年造化栽培力
他日明堂柱石材風挾雨聲龍起立月籠雲影鳳飛來
長令煉藥山中侶想像鬱藍天上臺

次韻題東岩

石巖削作鐵城埤荒磴盤盤一線微萬古筆峰歆日轂
半空劍石掛雲衣傍無板木愁猿過下有摩巢老鶴飛
此地從來天設險亂離民復得依歸

次韻同周子符晚步

溪上紫烟生遠林乘閑偶出散冲襟青山如故詩人老
紅葉無言秋意深萬里封侯非我願半生學稼識農心
涼風滿路歸來晚且對黃花索酒斟

次韻友人送別之淮東

萬里關河落木秋又攜行李上扁舟元龍湖海增豪氣
司馬山川愜壯遊帆影乍開風浩浩客程漸遠水悠悠
應知別後相思處明月天涯江上樓

客窓晚望

旅景蕭條霜氣催江楓樹樹錦成堆天高雁影和雲落
風急濤聲帶雨來未辦綠尊供客醉空憐黃菊向人開
一時歸興難排遣邂逅成詩亦嬾裁

武林舊館

寂寞江山舊帝州重來景物倍蕭颼客窓素月涼如水
子夜清風淡欲秋聽竹亭空蒼石古種松地冷碧苔幽
老懷正自難消遣嘹唳江邊過雁愁

挽楊震卿山長

芹宮半世守儒官冷况蕭然道自尊琴在舊堂湖月冷
劍橫新塚嶺雲昏吳山猶認生前面楚水難招沒後魂
雪滿西橋橋畔宅梅花心事與誰論

客中思歸

世道艱難轉覺危回頭五十五年非
紅旗黃紙從無分
白髮青山可息機二頃稻田環馬墅
一區茅屋傍漁磯
西風吹動家鄉念心與孤雲稍稍飛

馬墅所居地名

夏日周子符過訪用杜工部嚴公仲夏枉駕草

堂詩韻二首

溪流曲曲路盤盤遠辱高人此駐鞍
別久忽驚詩骨瘦
飲多尚覺酒腸寬茅齋雨積晴猶潤
竹徑雲深夏亦寒
坐對棊枰遺世慮不妨相與盡清歡

深谷幽居類隱盤
喜無俗客枉金鞍
門前脩竹籠烟碧
溪上閑雲度水寬
茶竈旋燒松葉濕
硯池頻滴井華寒
君來莫訝無供給
野水添杯罄一歡

賦林亭新霽二首

瀟灑林亭近翠微
雨餘斜日送清暉
茶香細細蒼烟起
樹影離離翠羽飛
林下無人敲竹戶
水邊有客製荷衣
偶來坐石乘涼久
閑看高松野鶴歸

恰匝松篁引樹涼
玲瓏窻戶納晴光
曲簷乍挂游絲細

斜隙初看野馬忙，紫蘚綠苔行處滑。碧芭丹實酒邊香，
留連自適清幽趣。坐聽琴聲古意長。

挽周子符

近陪談笑碧山堂，一別俄驚半載強。秋到聞公才卧病，
朝來走使忽傳亡。香銷琴室松風冷，燈滅書窓竹月涼。
惆悵老成零落盡，望雲揮泪倍悲傷。

送王本立赴京師

丈夫有志取侯封，賸喜君家襲世功。腰佩虎符頭已雪，

胸韜豹略氣如虹策書此日才名遂尊酒何時笑語同
若會故人張應奉為言畊釣老山中

次韻答道元上人

久住靈泉學苦空青青瘦竹伴癯容朝飛錫杖無驚鶴
夜誦經臺有聽龍說法精微多聚石洗腸清淨更餐松
歸來趺坐巖西屋白月如珠照筆峯

次韻中秋登水光山色亭時王縣尹季山長同

遊

策策涼風拂帽輕緩扶藤杖出西城縣公小隊能同樂
詩老高懷覺倍清白石清溪寒潦縮丹崖紫谷夕陽明
廣寒桂樹今何似贏得年年折又生

癸巳立春夜夢得詩一聯樹當曉戶生雲氣水
入春池汎日光覺後足成篇

山寇傳聞已破降一杯新酒浣愁腸樹當曉戶生雲氣
水入春池汎日光栢葉未欺華髮改梅花猶帶去年香
家居無事心逾喜八十慈親壽且康

雙溪道院贈葉逸民

讀書精舍最相宜一炷清香晝掩扉
虛白自生林下室軟紅獨上客中衣
閑階雨潤苔痕合小徑風清竹葉稀
邂逅與君同此興求詩問法兩忘機

再用韻二首

蕭條孤館傍溪湄榆柳陰陰綠滿扉
風挾水聲長到枕雨含林潤欲侵衣
一春客路情懷惡千里家山音信稀
爭似高人樂幽隱不知人世有危機

郭外人家近翠微
雨餘嵐氣濕窓扉
花畦軟土紅粘屐
竹徑深苔綠染衣
門巷日長人語寂
樓臺春盡燕來稀
靜觀萬物多消長
造化無言默運機

遣悶

風塵瀕洞幾時清
軍旅經過阻客程
江岸落帆春浪急
野橋沽酒夕陽明
朝廷將相非無策
田野耰鋤漫作兵
回首東南天宇濶
白雲飛處倍關情

聞子規

獨立溪頭聞子規寸心欲折髮成絲東風巷陌花飛處
細雨園林葉暗時顧我艱難頻作客經春愁悶強裁詩
雲山入望鄉關遠徙倚長橋有所思

錢唐亂後

滿城瓦礫總成堆往事傳聞尚可哀士族盡從西渡去
官軍却自北關來黃金宅第無完堵白骨沙場有濕苔
惆悵錢唐舊時月夜深空照怒潮回

次韻松學述懷

腐儒簾櫳愧無成偶向芹宮著薄名春晚石壇青杏合
日長芸几素琴橫此身漸覺垂垂老世事堪憐滾滾生
底用辛勤貪寸祿故山風月有餘清

次韻雨中述懷

湖水紆餘漲綠新門前杏子已生勻漫天風雨連三月
過眼光陰又一春況自慚同鄭老閑居爭得似安仁
老來堪嘯徵官縛懶性從來只任真

午溪集卷六

欽定四庫全書

午溪集卷七

元 陳鎰 撰

七言律詩

遊逍遙觀欲至雲岩不果

奉真門外逍遙觀銀闕瓊樓倚碧岑
萬樹古松雲氣濕一溪春水雨痕深
山靈久護黃金鼎僊客閒調白玉琴
欲訪雲岩天已夕杖藜他日約重尋

次韻松學諸友見寄

一昔與君分袂日特煩相送馬湖前
老來易覺吟懷惡別後多慙俗事牽
獨嶺松雲應滿塢東津花雨想添泉
還思重訪登臨地記得逍遙別有天

九日偕計山長遊西巖寺次韻

故人訪我當重九黃菊吹香滿一庭
邂逅登高同勝事留連到晚宿禪扃
秋陰積潤雲生几山意催寒雨近屏
坐對跏趺僧話久十年塵思豁然醒

夜宿道元上人房再次前韻

客至林房成一宿忽聞寒雨落空庭竹爐細火留餘暖
松戶深雲帶晚扃井水應潮生石穴洞霞成乳滴山屏
只緣景勝吟難就坐對龕燈酒半醒

次林彥文縣尹韻送劉伯溫都事撫安青田

三月江南草色新隨車零雨浥輕塵繡衣奉命安民俗
玉斧揚威出使臣玄鶴劃鳴雲洞曉青芝徧布石田春
太平氣象今重見老我甘為擊壤人

次林縣尹韻上元帥石末公

落日長風動大旗寧令雲鳥識神竒世家共仰侯門戟
兵策誰參別墅棊烽火時時蒿目力指揮往往竭心思
也知韓范兼文武還帶貂蟬侍玉墀

松陽感事

長松縣裏客重來舊上層樓安在哉天地無情經喪亂
溪山有恨起塵埃故人半已歸黃壤遺業多憐長綠苔
寂寞湖南烟色晚壞垣惟見枳花開

次韻魏縣尹遊雲巖小蓬萊軒

樹入仙巖一徑微
公餘到此及春暉
石缸香煖松花酒
雲縷光寒櫨葉衣
未向神人求藥匕
且從羽士問玄機
山中異境難留客
還向東皋步月歸

遊南巖寺

蟾溪南畔小栽嶺
幽磴盤盤上翠微
路轉山亭休客駕
林開雲屋挂僧衣
天池水淨涵秋月
石筍峰高障夕暉
勝地從來隔烽火
却憐人世劫灰飛

南巖一名小栽嶺

鐘梵無聲白晝遲沈沈古殿佛燈微石崖射日光搖几
林壑藏風冷襲衣自昔乾坤鍾秀氣至今山水發清暉
何時重到分禪榻坐看閒雲自在飛

和賈縣尉秋日往山中詩韻二首

野橋村路雨初晴滿袖涼風馬足輕松下幾年淹宦况
山中九日動詩情逢時又見黃花發感事俄驚白髮生
且喜囊中無長物只留琴劍伴回程

山色蒼茫翠欲流行經熟路憶曾遊西風鳥影寒塘晚

細雨蟬聲碧樹秋過眼年光如急電傷懷世事等浮漚
知君為國勤勞苦一寸丹心有百憂

奉和元帥石末公元宵二首

自嘆經年依半水那知今夕客嚴城中天月在無燈火
午夜風來有柝聲濁酒不澆胸壘塊衰年猶覺句崢嶸
昇平氣象何時見獨對梅花坐到明

節序蕭條寧似舊夜寒燈火暗孤城星河淡淡流雲影
鐘鼓遲遲咽漏聲撫事憂時心慨慷狂歌擊缶氣崢嶸

崑崙關破當今夕遺史重看眼為明

奉和元帥石末公春晴謾興詩韻

使君惠澤似春陽田有來年麥有桑日暖戟門旗轉影
風清玉帳劍生芒深山狐兔潛無跡曠野黔黎喜欲狂
今日朝廷方倚重論功應不愧韓張

暮春阻舟蘭江因病起登樓有作

清明寒食客中過病起強登江上樓遠樹雲間春漠漠
落花風靜思悠悠鄉書無雁頻勞夢波浪驚人久繫舟

何處悲歌連野哭老懷寂寞不勝愁

鳳凰山懷古

舞鳳山形無古今百年王氣已銷沈
荒涼禁苑經樵采寂寞歌臺貯梵音
草暗碧橋分野色石寒白堦鎖雲陰
傷懷往事空遺恨落日山前蟬亂吟

題吳敬夫草亭

亭在萬松嶺

草亭幽絕在林端蒼霧丹霞遶石闌
松葉覆山禽自語苔痕匝地竹成竿
繞花古井呼兒汲題畫新詩與客看

羨爾風塵能吏隱聽猿時踏嶺雲寒

友人移居再用前韻

故人移住碧雲端取次尋遊興未闌地隔城堦沉戍鼓
山連湖水有漁竿石邊芝草和雲采窓外松枝帶雨看
客至儘堪供茗飲古泓清浸玉泉寒

秋日偶懷

牢落天涯客倦游尚憐生計事悠悠二年道路誰青眼
半紙功名人白頭落葉蛩聲吳月冷涼風雁影楚天秋

傷懷處處猶征伐却憶滄浪舊釣舟

秋日登吳山望城東戰壘愴然有懷

亂後吳山依舊青登臨一望却傷情
長河白骨沈寒水落日烏鴉噪古城
湖上采蓮無畫舫關東種柳滿嚴營
繁華從此成消歇潮到空江恨未平

寄題陳此一鍊師壽巖詩卷

聞說仙都陳道士靈書真篆得心傳
藥爐火暖金丹熟壽穴雲深石髓堅
鶴起笙聲巖頂月龍回劍影洞中天

彭錢骨相應難老且住人間八百年

次韻陳府掾宿治平寺棲雲軒

詩客秋來款竹扃清談時得共高僧雲軒題畫朝揮筆
石几看書夜對燈香篆繞盤烟細細粥魚敲木響登登
寺樓高處宜長望水滿蟾溪綠似繩

對菊有懷季山長

薄宦經年未得歸西風黃菊已盈枝今朝把酒聊自適
此地看花多所思世事不干迎客少舊交久別寄書遲

莫言歲晚無廩粟山色水光堪樂飢

再用韻答松陽諸友

時自錢唐
回故云

青雲倦翮遠來歸尚愧棲遲寄一枝
眷眷親朋嗟久別昏昏燈火話相思
詩因感興吟來苦事不關心睡起遲
天地無情吾輩老亂離誰為卹寒飢

二年孤館客忘歸身似飛鳥繞樹枝
世路風塵多喪亂故山松桂幾懷思
黃花紅葉秋將晚流水閒雲意自遲
萬事無憑如夢飽區區誰解悟真飢

感懷呈友人

落才疎只自憐
狂吟詩句漫成編
三彭已伏庚申日
六甲初周戊戌年
心事無瑕如白璧
此生守直類朱絃
相逢且共尊中酒
身外窮通總付天

次韻遊溪南野寺

蕭然野寺愜清遊
禪老詩人總素流
迎客却從雲外入
烹茶少為竹間留
庭空古桂疎疎雨
池淨青蓮淡淡秋
欲效淵明同結社
遠公還許再來否

冬至日同友人尋梅翌日過溪南有作

芒屨藜杖踏山雲客裏尋梅詎厭頻行到溪南纔見樹
看來枝北未多春水清沙白香微動雪虐霜欺色愈真
喜得陽和消息早好分生意與詩人

次韻答葉訓導

長松廢邑兵戈後舊館秋深木葉零烟滅市心雙井古
雲飛溪上數峰青東臯訪鶴逍遙觀南麓尋僧抱膝亭
多謝攜尊慰岑寂夜檐還共看文星

次韻客懷二首

孤館淒涼歸計遲，世無鮑叔少相知。
天寒疲馬空喧櫪，月冷棲鴻尚凍枝。
沽酒消愁忘爾汝，題詩適興記吾誰。
西風昨夜吹庭樹，叢桂山中入夢思。

三年客裏寄行藏，搖落秋深感異鄉。
久敝黑貂驚歲月，漸疎白髮老風霜。
乾坤納納胸襟濶，山水迢迢道路長。
遙想故園清露曉，滿林橘柚眩初陽。

丁酉秋浙省除青田主簿，戊戌三月再調松陽。

感慨有作

牢落乾坤一腐儒，却憐半世事詩書。
廣文方入中朝選，主簿重承外省除。
長擬報恩憂力薄，更教佐邑愧才疎。
踵門有客來相賀，旋買芳尊剪野蔬。

次韻感事

獨立西風塵滿眼，紛紛鷹隼少文鴛。
自憐人世逢多難，誰叩天閭上萬言。
黃濁水深龍噴薄，青冥日迫雁聯軒。
客懷寥落秋將晚，空對黃花憶故園。

再次韻懷歸

褐衫偶着來從宦也躡通班綴鷺鵷報主慚無補袞手
歸田只合共農言年來舊業書千卷老去閒心竹一軒
有地寬閑午溪上木奴更種滿秋園

次韻葉訓導雨中漫興

避亂三年依郭外青蘿白屋鎖寒烟繞階山葉秋蟲響
照榻書燈夜雨懸半紙功名猶未就數莖華髮已堪憐
尋詩有客時相過竹下芳尊想未眠

再次韻遣懷

宇宙荒涼秋氣肅剛風未掃綠林烟人間烽火時時起
天外妖星夜夜懸萬事多端何日靜一官獨冷有誰憐
故山風月應無恙歸到溪軒且晏眠

中秋小酌分韻得長字

故人中秋設佳宴垂簾下榻開中堂老桂清香沁露冷
衆賓醉語含風涼上窰瓷器飭肴饌長生木瓢行酒漿
歡然飲罷雨忽作索紙題詩牽興長

中秋風雨再用懸字韻

長天雨暗中秋月兔影蟾光隔霧烟疲戍抱關雙泪冷
小儒憂國寸心懸陰晴天意詎能測悲樂人生只自憐
賴有桂花香醞藉挑燈孤坐不成眠

次韻葉訓導移居

曾向溪南隱一丘攜家今住市西樓水聲通沼涼生袂
山色捲簾青入眸竹竈煮茶銷白晝石床壓酒醉清秋
安居此外隨吾分可效涪翁賦四休

次韻夜坐聽雨

寂寞山齋孤坐夜西風落葉雨瀟瀟
水光入室涼偏潤
地氣侵衣暑頓消
靜念人情狙賦芋更憐世事鹿藏蕉
何時洗却儒酸態還共扶搖上九霄

送元帥胡公往遂昌平寇

大將雄姿豹威濟時又起着戎衣
牙旗有象分行伍
鐵騎無聲聽指揮
黃石一編參武畧孔明八陣合神機
此行盡把妖氛掃
笳鼓風清奏凱歸

重陽後二日遣悶

去年登高蓮城北今年復在松山陽
自嗟頭髮間白黑忍見菊蕊含青黃
世亂甲兵戰未已日報羽書馳更忙
苦無尊酒慰寂寞東望家山愁思長

次韻胡元帥題邠山

邠峰高聳碧孱顏見素真人此煉丹
古井水寒通遠海紫壇雲暖擁羣山
境超大地三千界天近層樓十二闌
遙想瓣香朝謁處青霞深護玉宸班

遣懷二首

平生賦性本疎頑，拙宦雖縻心自閑。
黃菊尚留秋後徑，白雲長在望中山。
瘦軀多病惟儲藥，空屋無錢不用關。
松下兒童應笑我，鬢毛只為作詩斑。

不出門庭，腰腳頑幅巾。短褐稱蕭閑，墨濃硯石迷。
離眼香暖爐烟起，博山睡美黑甜便。
老懶飲酣白墮息，機關今秋已負登高興。
空想重巖細菊斑。

次韻劉宗保秋懷二首

溪上青山抱郭回，濛濛烟雨暗樓臺。
平原日暮牛羊返，遠路風高鴻雁來。
斷續砧聲何處響，淒涼菊蕊為誰開。
知君獨抱憂時苦，我亦深同杜老衰。

擾擾風塵滿眼愁，乍寒天氣怯深秋。
齏鹽況味聊堪守，竹帛功名不用求。
今日聞雞無祖逖，當年夢蝶有莊周。
自慚衰老將歸隱，二頃還須為鶴謀。

次韻述懷

時命多仇道未窮，愁懷如酒味偏濃。
爭憐軒蓋能乘鶴，

誰信泥沙解困龍黃葉一庭人迹少青燈孤館客情慵
西風吹冷衣中線深念當時密密縫

次韻答松學諸友二首

門掩蒼苔人寂寂樹深幽鳥自鳴酬溪雲帶雨來池上
林葉隨風下屋頭萬卷有餘兒解讀一瓢自樂我何求
山空歲晚梅將發寒夜茶爐肯共不

不嫌官舍羶長冷酒熟詩溫可獻酬賸有禪談來白足
更無俗事委蒼頭觀魚真樂惟心會識馬天機不色求

我願買田為隱計未知造物肯從不

訪梅

溪上離離雪乍晴乘閒偶作訪梅行
露寒徑怯青鞋濕風冷枝驚翠羽鳴
孤艷向人春漸透暗香浮處水偏清
留連為爾牽詩興不覺沙頭月又生

雪後過溪南二首

東風吹我過溪行沙路迢迢傍野平
通堰水聲冰下響背城山色雪邊明
大田春早農歸業故壘雲空戍解兵

幽鳥亦知人意樂飛來枝上語新晴

輕衫短褐稱閑行遙望長湖鏡面平
草際雪消開凍色沙頭日出映波明
喜聞盜賊為黎庶幸免糧鋤鑄甲兵
今日追游差可樂謾將詩句賞春晴

再次韻述懷二首

萬事區區磨蟻行胸中壘塊未能平
山深小縣春猶冷溪近層樓月易明
多病未因詩作祟破愁謾以酒為兵
倦拋書卷支頤坐閑看飛雲弄晚晴

擊節狂歌酒屢行樓遲宦況負平生流年冉冉青春過
衰鬢蕭蕭白髮明觸事每憐遭語棄忘機已覺息心兵
飄然歸思如風柳萬縷千絲亂曉晴

二月十日樞府辟往栢城再用韻別諸友

驪駒歌罷尚遲行一棹長溪春浪平岸柳依依連野碧
林花灼灼映空明苦吟每笑杜工部愛酒猶憐阮步兵
薄暮落帆松嶺外相望月淡雨初晴

次韻友人過訪

溪上東風吹帽斜故人乘興到山家掃雲坐石因看竹
拾葉分泉為煮茶十載功名如沐漆半生學業似吹沙
只今擬作郊居賦無奈憂時鬢早華

次韻餞別

清尊終日共徘徊苦為吟詩擊鉢催脩竹滿庭蒼雪落
好山當戶晚青來斜陽林外人相別流水溪邊首屢回
今夜相思知獨苦不禁寒月照窓梅

病起有作

披衣曉起坐中庭稍覺春深肺氣平
游宦三年頭愈白
居山數月夢還清
階蘭楚楚新芽茁
逕竹猗猗綠笋生
幸喜晚年無別事
有田二頃樂歸耕

再用韻答友人

日長迎客過門庭
閑坐荒苔石磴平
烟際柳條無賴碧
雨餘湖水不勝清
我無才力如韓子
君有詩名似孟生
亂世相逢宜共隱
一犁慎勿廢勤耕

次韻登玉溪山絕頂

溪頭一片碧崔嵬我為尋幽亦上來山勢漸高黃葉盡
天光忽近白雲開因懷王子笙吹月更憶羊公石卧苔
此處儘堪逃亂世漁郎相見莫相猜

午溪集卷七

欽定四庫全書

午溪集卷八

元 陳鎰 撰

七言律詩

次韻山莊

一徑縈紆繞澗邊東風吹雨漲山泉
綠陰樹合編茅屋黃濁泥深種秫田
池暖魚翻雲影動巖空鶴唳谷聲聯
莊近赤巖何因無事能來此燒竹烹茶掃石眠

次韻友人見寄

我慚衰病似文園，倦迹棲遲不出門。
世路風塵何日息，江湖舊友幾人存。
移家避難依山頂，開徑通幽斷樹根。
待得衡茅新結就，約君來此共汙尊。

庚子歲旦次韻

山城兵火經過後，舊業能留幾人。
萬事從來皆定數，一杯且喜及新春。
謾憐兒女稱吾壽，深荷天公眷此身。
坐對青山無愧色，紅塵幸不污漁巾。

蓮城感事次韻

一自兵戈破枯州豪華盡付水東流
惟聞夜雨新城折
不見春風舊市樓
負郭田荒青草合
依山冢廢白楊愁
烟塵滿眼何時靜
尚說江淮戰未休

舟中次友人韻

溪頭日出曉風生
一片歸帆促早程
極浦沙寒冰皓耀
遠山雲盡雪崢嶸
君如杜甫猶羈旅
我似馮唐已老成
回首荒城城下路
青苔白骨易傷情

次韻海棠

海棠花下聽啼鶯無奈愁多積似城亂世每憐家累重
休官僅得此身輕年來憂事添衰病老去看花減舊情
便恐臙脂污泥雪明朝風雨近清明

次韻留題此巖

留此巖前瀑布懸雲開古洞見青天仙人丹化無來鶴
舊傳丁仙煉丹於此釋子禪閑獨種蓮荒徑苔深初過雨空山花
暗自流泉誰能結屋依林下夜聽松風枕月眠

次韻友人雨後過綠猗亭

山徑無人掃白雲苔痕草色雨餘春
款門看竹客無事汲井烹茶主不貧
亭外幽花閑自落林間啼鳥偶相親
知君未擬歸城市曳杖時還訪野人

次韻葉文範訓導見寄二首

騷客攜書過遠林日長無事稱閑心
路通巖寺僧供茗樹合山叅鶴聽琴
兩處懷思憐近別一封書札寄新吟
玉溪風月渾如舊應念青青竹數尋

我懷食口衆如林遣悶聊攄玩物心容膝自安元亮宅
賞音誰識伯牙琴溪頭蒼石看雲坐竹外幽軒聽雨吟
多謝作詩相慰勞却慚衰髮老駸尋

次韻道元上人遠回

青青錫杖雪侵頭歷徧名山始倦游明月歸來巖下寺
清風吟倚峽西樓羨師得道如文暢老我棲身似許由
試和詩篇扣禪意世間誰解悟浮休

和周內翰題紫虛宮韻

清溪紫谷繞琳宮
縹緲樓臺在半空
人世幾回經劫火
此山終古有仙風
斗壇露冷星華濕
丹井泉甘海脉通
試想蓬瀛無此處
雲深島樹碧于葱

次韻九日同友人小酌

憂樂隨時道未窮
何須咄咄更書空
艱難老我頭添白
富貴從渠面發紅
稍喜得閑詩有債
却憐多病藥無功
為君掃取溪軒淨
共對寒花酒一中

次韻友人對月感懷

有客臨溪玩月明樓高不用夜寒生二年此地因逃難
孤影他鄉易感情露下長天含夕潤風來大野起秋聲
想君未厭山中住且與漁樵混姓名

次韻吳伯京學正清明拜墓

清明拜掃陟山丘積草荒苔露未收林鳥紛紛爭曉祭
野花寂寂自春愁眼前兒女能供奉身外功名豈用謀
此日歸來天漸晚半痕新月掛城樓

次韻劉彥英教授春日同宴吳元正宅

林下詩翁偶出來凭高一望壯懷開山川如故人應老
城郭都非鶴自回遠樹拂雲明似畫長溪過雨綠於醅
喜逢佳友同春賞花底芳尊得款陪

閑居遣興

拋却微官興浩然歸來茅屋已三年林間掃葉因風後
溪上看花未雨前白板橋通沽酒店綠楊樹繫釣魚船
此生已決投閑計自種村南百畝田

再和韻

清溪繞屋竹蕭然瀟灑蕉衣樂暮年
數點歸鴉流水外
一行飛鷺碧山前
功名已似沈泥劍
歲月還同下瀨船
試向小亭閑玩物
滿池荷葉綠田田

郡中會伯玉

不見齊君二十年
舊游何許一茫然
因悲世事如雲變
尚喜交情似漆堅
廢市雨深蒼樹合
嚴營風靜彩旗懸
明朝又作溪頭別
遙望岑峰月漸圓

次韻九日招友人飲午溪樓

亂罷君來居此地兩逢重九共持觴舟移野渡衝殘雨
人倚曾樓醉夕陽頭髮又添今日白菊花只似舊年芳
登臨無限傷時恨盡付東流溪水長

次韻毛彥明訓導過訪

山齋終日睡昏昏有客相過夜向分張燭共談三載別
讀書謾守半生勤自憐冷味齏鹽淡不放冰腸麴蘖醺
明日沙頭又分手小舟撐破一溪雲

和葉子華見寄韻

三年冷舍近蟾溪青杏婆娑桂樹低巖寺每尋僧說偈
皋亭還與客分題別來歲月身逾老亂後山川塵尚迷
想見東林如舊日好隨松鶴共幽棲

題秦少游別壘法師詩後

昔聞淮海秦公子謫宦南來古栢城晝卧藤陰迷客夢
春游沙外聽鶯聲三年監稅無他事一日逢僧話此生
結社題詩遺跡在高風還似晉淵明

壬寅三月八日避亂西澗十八日復移石梁寨

瀟瀟苦雨濕衣裘
兩度移居尚未休
巖樹層層雲霧暗
野花片片石泉流
怕遭兵火依高寨
愁對妻兒憶舊丘
恰似攜家江上住
明朝風浪又移舟

次韻西澗主人二首

憂時心緒亂如絲
世事安危局面碁
倦驥長年悲遠道
驚烏明月繞高枝
絕憐素髮垂垂老
深念綈袍戀戀時
春晚故園歸未得
想添新筍滿階墀

落花飛絮共游絲
長日閑消別館基
隴麥雲深連宿穗

井梧陰合長孫枝川原自覺同仙境人事猶如未亂時
濁酒一尊聊自遣坐看新月上前墀

次韻雜興二首

世事無窮蟻磨還移家暫隱此山間耕桑自樂民風厚
兵火無驚客意閑沙岸水明花的的石闌風暖鳥關關
赤巖聞道猶奇絕約子何時共陟攀

繞澗青青萬竹林一春為客此登臨傷懷事往聞猶怕
遣興詩成懶再吟交友每多時俗態知君獨有歲寒心

山窻岑寂松陰晚謾寫薰風絃上音

輓孫伯融都事

半生湖海不相逢
亂罷蒼山始識公
暫領一州兼節度
更分數屯總元戎
風流翰墨文多燭
壘塊胸襟酒屢中
偶墮奸謀身竟死
千秋萬古恨無窮

次韻友人游吳山別墅二首

亭館高明客喜臨
門深無事寄豪吟
日長幽鳥窺簾影
風定閑雲墮砌陰
香裊古屏書滿案
苔封蒼石竹成林

晚來更適無窮趣洗耳重聽月下琴

主人開宴賞新晴濃綠陰陰如水清
銀甕碧香浮臈味錦箋繡句寫春情
倚闌看盡先尋譜掃石圍棋默用兵
款客殷勤忘晝永夕陽猶隔小溪明

和周山長別後見寄韻

窮居彼此共棲遲薄宦無成與願違
白髮五年愁避亂青燈一夕喜論詩
雨涼吠蛤喧人耳風定流螢入客衣
別後相思心獨苦猶懷把酒夜深時

中秋對月次韻

屢遭離亂奈愁何對月今宵感慨歌
萬里烟塵連紫塞九天風露下銀河
無人折桂當秋賞有女乘鸞或夜過
歲歲青光只如舊却憐白髮滿頭多

上總制胡公次陳伯亮韻

安南上將喜來歸路入雙溪暑氣微
憂國半生心獨苦籌邊三載盜應移
暫分外省紆華選合向中朝侍衮衣
一道奎光照蒼括深山窮谷被餘輝

朱門畫戟衛嚴居
甌越民安絕吏漁
身佩龍泉三尺劍
家傳豹畧一編書
且須部列平沙幕
未許閑乘下澤車
白髮小儒瞻望久
自憐爾雅注虫魚

挽李山甫教授

避亂山中白髮垂
近聞訪舊入城池
蘆花月淡人無處
桂子風涼鴈過時
旅襯回程扶道左
舉家迎哭向溪湄
他鄉莫恨相知少
自有門生奠酒卮

和葉仲和文學見寄韻

馬湖橋畔曾分手五見涼風換葛衫上國無媒干祿養
北山小隱免林慚石池乘月通泉水苔徑鋤雲種竹杉
多謝相知為相問心閒日與野人談

次韻友人生日

枯山隱士喜年高點點霜華入鬢毛雲屋天香生古桂
霞杯春色映仙桃翻經釋子飛金策稱壽詞人集褐袍
我亦知君眼如月夜窓不厭看書勞

次韻友人游留此巖

今春曾作此巖游
花落山空水自流
到院怯逢僧定後
看雲始悟此生浮
長松結子應千歲
老鶴生孫知幾秋
尚憶箇中風景好
何須海上覓蓬丘

勝地何因得再游
石闌干外看飛流
青江樹老霜華冷
金碧山空土氣浮
清楚夜收僧步月
小亭晝坐客吟秋
知君獨有林泉樂
我亦相將卜隱丘

次韻鄭訓導二首

幽人曉踏渡頭沙
遠趁闌雲訪我家
投老山中聊煮石

尋仙海上未乘槎
尊傾綠酒酬彭澤
盤飮黃柑擘永嘉
日短天寒年已暮
且看飛雪散瓊花

一水回環漾淺沙
竹林深處老夫家
山童招鶴穿樵徑
溪鳥窺魚立釣槎
人得居閑心獨靜
詩因吟苦句方嘉
窮居漸覺回春意
簷外梅枝已著花

次韻葉訓導元旦攜詩見訪

苦吟詩客鬢蒼華
又向東風試墨花
栢葉謾供新歲酒
竹門還訪故人家
紛紛世事仍多患
落落吾生未有涯

溪上五年相伴住釣竿隨分占鷗沙

次韻葉文學立春日城廻過訪

寒盡山城換歷頭雪消春水滿汀洲
梅花村外逢朋舊竹葉尊前話客愁
直把詩書為活計故應魚鳥識風流
老來豪氣猶如昨共卧元龍百尺樓

郡中元夕次韻

遠水粼粼生淺洲溪風吹月上城頭
軍中撾鼓春營宴馬上觀燈夜市遊
誰向崑崙重斫寨獨懷鄉國謾登樓

凋零人物都非舊，賴有梅花慰客愁。

次韻友人郡中訪舊

春日泊舟城外川，故人相會問平安。
十年牢落謀家苦，四海亂離行路難。
旅館青燈宵雨暗，戰樓畫角晚風寒。
豪華往事誰能說，莫向尊前起浩歎。

贈醫人馮英伯

一別馮君今十載，重來猶帶舊行囊。
空窻灸艾消沈疾，新卷編蒲寫秘方。
閱世已經三折臂，憂時還轉九回腸。

養生道要如相授分我刀圭換鬢霜

次前韻答王子如

秋日故人來野堂生涯彼此一書囊
投閑已著歸田錄養老還求種樹方
謾有篇詩酬逸興可無尊酒沃愁腸
白頭亂後俱强健却似黃花獨耐霜

次韻齊子和山長過訪

竹外書齋午睡醒忽驚有客扣門聲
十年離亂成分首一日相逢話別情
歲晚吾仍憂病肺天寒君尚促行程

明朝又向山城去滿路梅花入品評

奉和王憲使賀總制胡公得平陽詩韻

平陽一旦送降旗大將威名衆所知聚石江流分八陣
通途海國絕他岐許君劍在蛟須斬韓子文成鯁定移
盖世功勲垂不朽繡衣使者著聲詩

山行至桐川會周山長

遙望長松何處是深山猶認舊川原行程客厭闌干路
此處路險多用石闕生事農忙碌礧村若箇峰邊雲出沒叢生樹

外月黃昏武昌詩客欣相會
夜向溪軒共一尊

五月二十四日游平山菴客懷豁然用前韻呈

周濟川葉誠中

一菴瀟灑何年構
半近青山半近原
羣木叢中留古冢
小軒明處見孤村
竈燒落葉茶烟濕
門掩蒼雲竹日昏
羨爾主賓無箇事
晚涼堂上注芳尊

欲至松學連日阻雨再用韻奉簡諸友

欲訪蟾峰雖咫尺
瀟瀟風雨隔平原
故人只在松邊館

倦客空吟竹外村
兩處離懷溪水濶
一襟幽思嶺雲昏
舊栽青杏今何似
想見陰濃覆酒尊

壽蔡伯玉隱居

故人年長周花甲
嘯詠溪山樂有餘
世隱一區楊子宅
家藏萬卷鄴侯書
歌姬擁座飛瓊管
賀客盈門集翠裾
最好聯魁堂下桂
年年開占月明初

八月三日伯玉留飲西澗別館二首

前年避亂此山中
今日還來訪隱翁
山色入樓簾捲雨

水聲落澗坐生風身安畎畝如龐老妓擁登臨擬謝公
筵客殷勤到曛黑酒酣攜手石梁東

憶昔遨遊湖海中只今華髮總成翁詩詞倣古多唐體
人物居閑有晉風且把酒杯酬地主莫將世事問天公
何當結屋來相傍坐聽松風澗水東

同孫伯起遊留此巖再用前韻

偶來聽瀑此巖中藜杖相隨只兩翁涼氣著衣梧葉雨
秋香薰路桂花風洞幽僧禮白毫相潭淨魚游赤鯁公

坐久石壇林影亂斜陽歸踏小橋東

次韻周山長見寄

久客松州生有涯

松陽一名松州

青山無價儘堪賒苦吟只為

酬詩債薄俸多應付酒家十載風塵雙短屐半生江海
一浮槎如今老去宜謀隱靜閱丹書憶少霞

題何子遠典史詩卷

風塵十載共飄零湖海空留漫浪名君為奉親辭薄宦
我因歸計識勤畊天機袞袞青春去世事紆紆白髮生

好向溪頭理漁艇綠波烟雨結鷗盟

次韻祝公亮經歷見寄

辭官陶令歸來久我亦居山結草堂
亂後病懷惟藥裹老來活計祇詩囊
曾陪古寺看脩竹忽見春風綻野棠
但願此身強健在歲寒松柏共蒼蒼

次韻伯玉隱君大方上人過訪

地僻深門傍竹開一溪流水碧於苔
雲邊煮茗延僧坐石上留碁遲客來
白社閑居宜老境青雲濶步屬英才

艱難世故猶如此且共筵前有限杯



午溪集卷八

欽定四庫全書

午溪集卷九

元 陳鎰 撰

七言絕句

游南明山次周子符韻

蕭蕭落葉委空山
幽磴添苔護石闌
一自三平騎虎去
至今龕洞白雲寒

再次韻畬海翁上人

為愛石梁擔負山照心亭上久凭闌松篁不動雲飛盡
清磬一聲山月寒

紅塵飛不到青山留得詩人倚石闌林鶴已歸僧未返
半巖秋雨瀑花寒

夜泊桐江

拖牙伊軋濤驚枕舡腹淒涼月射窓正是客愁無處著
數聲寒鴈起滄江

客枕

滿城風露氣漫漫鐘鼓聲中漏欲乾
夢覺忽驚身是客半簷殘月五更寒

重游南山二老亭回望前朝大臣故冢

前朝文物已凋零感慨重登二老亭
荒冢尚留翁仲守百年松柏自青青

過溪居次韻

玉溪溪上晚春餘涼榭蒼藤日影疎
閑傍竹門南畔過石闌陰處看儵魚

客中見菊

病骨驚寒欲授衣
年來身世更支離
菊花相見渾如舊
何事詩人鬢易衰

同友人游龍臺山勝因寺

三枝藜杖陟秋岡
風露初交野菊香
行到勝因鐘已午
坐延松影過回廊

游清福寺

昨日勝因扶杖去
今朝清福駕舟來
老禪迎客長松下

閑對黃花掃碧苔

獨坐

一炷沈烟百慮清
殊方十月早寒生
蒲團竹几西窓坐
閒聽西風送雨聲

古斷腸曲

花落長門日易昏
不因芳草為銷魂
玉闌干外東風過
吹落果愚月一痕

再游南明寺和舊題韻

十載無因到此山滿塔苔色上層闌堂中禪老眉如雪
獨與青松耐歲寒

村景

陰陰桑柘雨初晴一片平田白水生野老相逢無別事
共過深巷聽鸝鷀

屋後青山屋外溪穿芳度密有深蹊白雲不隔經行處
容我時來寄杖藜

得張脩撰書

一冬卧病纔方愈清曉開門起看梅野服忽然逢驛使
翰林脩謨寄書來

題松竹梅圖

一樹梅花兩箇松數竿脩竹共清風生來不作趨炎態
歲晚相看冰雪中

夜飲月波堂

花影當簾春夜長主人迎客月波堂深情得似深杯量
消盡銅匱一篆香

次韻題江山小景二扇面

漠漠風烟遡碧流
荻花搖蕩一江秋
漁舟遙繫人家外
短笛數聲生晚愁

江上數峰凝紫烟
江頭一水碧於天
月華明處秋空闊
疑有緱山駕鶴仙

題閻仲彬墨菊

采采秋花不自持
黃裳正色變緇衣
江南江北風塵暗
三徑淒迷何處歸

題美人背面欠伸圖

東風背立好腰肢
脉脉含情睡起時
若使畫工開正面
羅虬應不詠紅兒

客中雪夕

凍雲黯淡連江樹
東望家鄉鄉何處
偶沽斗酒聊為歡
閉門風雪千山暮

漁父

短篷烟雨泊鷗沙
賸有魚錢到酒家
近日人間多賦歛

爭如水國作生涯

余患肺病徐子蒼寄詩問安次韻答之

徑竹猗猗綠似雲
滿階涼影石苔新
故人遠寄相思句
應念山中老病身

深巷沈沈白晝間
一區林屋自清寬
業多尚覺身為患
慮遣應無心可安

次韻聽竹亭

乘閑來坐此君亭
瀟灑惟便客子情
門外黃塵深沒馬

誰知此地自秋聲

夜起

縣齋靜夜秋風起
落葉蕭蕭撲窓紙
酒醒疑是山雨來
月明滿地涼如水

宿蟾峰

湖上蟾峰鎮碧波
萬家高倚石嵯峨
我來却值秋初霽
快靚中天月色多

游南巖三首

天池

步上巖頭路百盤石梁霜葉滿闌干白牛卧處雲飛盡
惟見天池一鏡寒

抱膝亭

白雲深處啟重扃一徑斜通抱膝亭北郭戰塵吹不到

老僧猶指樹青青

亭北見
縣郭

妙高臺

妙高臺在諸天上如入如來不二門欲把一言參妙處

是心默契已忘言

三月十日游南明照心亭和舊題詩韻

魯題詩句在名山感慨重來倚石闌三十年餘僧自老
空留池水照心寒

奉和劉伯溫貧外漫興詩韻并自述一十五首

蒼嶺愁雲樹壓低青田明月鶴高棲也知天庇神仙境
秋色依然滿好溪

杜老從來隱草堂每憂時事九回腸如今穩駕扁舟去

且玩西江夜月涼

經年為客在王門慨古論今道自尊應念山中貧病叟
獨尋黃獨斲雲根

曾記開尊向夜分北山堂上共論文可憐一炬成焦土
空有荒垣鎖暮雲

鶴骨清癯稱葛衣翱翔湖海未言歸荷花開盡炎光老
又見江頭木葉飛

蒼茫天地一郵亭客裏相看眼孰青江北江南經亂後

故交零落似晨星

未許身閑隱薜蘿
府書辟起聽鳴珂
知君久佩文章印
問字應多載酒過

處世無為富貴酣
急流勇退是奇男
悠然自在樊籠外
閑對江山雪滿簪

我今老矣守林泉
破屋蕭然一榻懸
每向秋宵看月色
懷人千里共嬋娟

猗綠亭前竹滿林
紛紛蒼雪落層陰
開軒載誦清風句

歲晚寧忘故舊心

昔曾游覽徧山川
汎汎身如不繫舡
今日棲遲茅屋下
却憐多病對雲眠

門外清溪水氣寒
喜無塵俗事相干
重陽誰共尊中酒
忍見黃花白露漙

山深五月嘯黃鸝
秋到惟聞烏夜啼
欲寄相思無便使
空吟短句付詩奚

貧病真同涸轍魚
澆愁幸有酒堪沽
秋來詩骨饒清健

自喜登高不用扶

秋水溶溶綠一灣
青山疊疊白雲閒
而今不作功名念
容我逍遙山水間

午溪集卷九

欽定四庫全書

午溪集卷十

元 陳鑑 撰

七言絕句

借漫興一十五首

碧樹參差竹屋低
半生此地愜幽棲
悠然不盡登臨興
屋上青山屋下溪

紅塵吹不到溪堂
時掬清泠沃酒腸
山外亂鴉飛過盡

數聲漁笛晚風涼

徑竹猗猗晝掩門
日移清影過芳尊
午香一炷閑無事
坐看幽禽下樹根

一笑歸來避世紛
山靈不用勒移文
白雲本自無心出
我况如今懶似雲

十載緇塵染客衣
田園今喜賦來歸
此身與物同閑適
倦翮孤雲自在飛

溪頭擬結野翁亭
更種溪傍萬竹青
白髮一尊聊自遣

夜深時看老人星

窮簷陰合翳松蘿
迎送都無白玉珂
從此只知田野事
山人溪叟日相過

淵明歸隱成疎懶
謾自題詩責五男
三徑盤桓有餘樂
葛巾牢裏棄纓簪

殘年飽飯獨怡然
陋室從教似罄懸
賸喜繞階多竹色
晚來新月鬪嬋娟

一區舊宅帶秋林
占斷溪南十畝陰
長日坐分鷗鷺席

嗒然忘我亦忘心

秋風吹綠漲晴川老去生涯一釣船
人世烟塵猶眯目
爭如沙上共鷗眠

矍哉陋兒笑儒寒微祿資身已懶
干手種園中千樹橘
黃金顆顆露溥溥

百畝新承溪上堰年荒幸免為飢啼
舉家從此無憂色
却笑涪翁憫跛奚

買得漁家一尺魚床頭酒熟不須沽
三杯飲罷斜陽裏

行看青山信杖扶

溪上幽居無限好
天分地位頗寬閑
我生本是疎慵者
只合漁樵老此間

次韻吳學錄春日山中雜興七首

亂世艱難寄此身
暮年食蓼有餘辛
一春勝事成虛擲
空憶蘭亭王右軍

碧山深處息兵戈
石竇甘泉冷齒牙
絕似天臺舊風景
何人能復飯胡麻

林樹深深石徑斜野橋村塢兩三家蕭條門巷人行少
惟見疎桐自落花

功名老去念頭輕盡日看山眼倍明甚欲買田為隱計
囊空未辦孔方兄

睡起書齋日正中松花飄粉滿房櫳山童頗解詩翁意
茶竈猶藏宿火紅

一溪流水繞山隈岸草青青長舊茅鷗鳥不知人事異
自隨釣艇去還回

故老相逢竹外村能談舊史憶乾元大兒昨日從軍去
惆悵無人給曉昏

題湖山十景

翠屏晚對

為愛群山列翠屏竹門終日不曾扃溪風吹却白雲去
添得他山一抹青

綠野春畊

雨足田疇春水生青陽浮處有農畊村南村北秧初綠

布谷樹頭相對鳴

月浦泛舟

與客攜壺夜泛舟
水光不動月光浮
洞簫吹徹湖山靜
應似坡仙赤壁游

雪溪垂釣

水濶天寒雪正飛
漁翁猶在水之湄
憑誰畫出溪頭景
簑笠孤舟獨釣時

竹樓清眺

竹外登樓興自豪紛紛蒼雪冷吟袍浮雲吹盡秋空濶
獨鶴歸來山月高

松嶺早行

松林曙色未全分半入青山半入雲落葉鐘聲何處寺
行人疑在夢中聞

古寺鐘聲

隔溪古寺夕陽時風送鐘聲落翠微想見老僧歸院晚
山童未掩白雲扉

平川霽色

渺渺平湖蕩日光
漁烟起處隔滄浪
登樓有客看秋霽
楊柳風多滿袖涼

西山牧笛

西山山下草離離
斷隴平坡雨過時
牛背牧兒歸路晚
數聲短笛倚風吹

東岸漁燈

月黑樓前湖水明
漁燈點點過沙汀
蘆風忽起光還滅


疑是寒宵夜燐青

道徑東巖砦

荒村寂寞兩三家故壘東邊石徑斜
巖樹不知人死盡春來還發舊時花

贈別周善長之金華

風捲山雲雪乍晴又攜書卷促行程
知君此去雙溪上一路梅花管送迎



午溪集卷十